

Headlines

1. शिक्षा मंत्री धर्मेन्द्र प्रधान होरें छात्रें दे विरोध-प्रदर्शन दे चलदे इस्तीफा देई दिता- उ'नें अपना इस्तीफा प्रधानमंत्री मोदी होरें गी सोंपेआ।
2. द्रास च कल होने आहले करगिल विजय दिवस समारोह दे सिलसिले च रक्षामंत्री राजनाथ सिंह हुंदा श्रीनगर पुज्जने पर उपराज्यपाल मनोज सिन्हा होरें सुआगत कीता।
3. उपराज्यपाल मनोज सिन्हा होरें राष्ट्रीय शिक्षा नीति दे 6 बरे पूरे होने पर श्रीनगर च रीडिंग मैराथन दी शुरुआत कराई।
4. खराब मौसम दे चलदे 6 दिने धोड़डी बंद रौहने दे बाद माता वैष्णो देवी जी दी यात्रा अज्ज ब्हाल- ज्हारा बदे शरदालुएं पवित्र गुफा च मत्था टेकेआ।
5. ते मौसम विभाग नै अगले 5एं दिने दौरान जम्मू-कश्मीर च बरखा- चानचक्क हाड़ें ते ल्हास पस्सियें दी पेशनगोई कीती ऐ।

<><><><><><>

Pradhan Resignation

शिक्षामंत्री धर्मेन्द्र प्रधान होरें अज्ज प्रधानमंत्री नरेन्द्र मोदी होरें'गी अपना इस्तीफा सोंपी दिता ऐ। अपने इक सोशल मीडिया पोस्ट पर प्रधान होरें आखेआ जे पिच्छले 10एं दिनें सवां छात्रें दे विरोध-प्रदर्शन दे बाद पैदा होए दे हालात करी ओ दुखी न ते एह उन्दे लेई व्यक्तिगत प्रतिश्ठा दा विशय नैई ऐ। उ'नें आखेआ कि जंतर-मंतर ते समूलचे मुलखै च बने दे मजूदा हालात दा राष्ट्र-विरोधी ताकतां फैयदा नैई चुकी सकन ते कुसै बी विद्यार्थी दा भविश्य कनूनी लफड़ें च फसियै नैई रेही जा, इस करियै उ'नें इस्तीफा देने दा फैसला लैता ऐ। प्रधान होरें प्रधानमंत्री मोदी हुंदे मार्ग-दर्शन, भरोसे ते लगातार सहयोग लेई उन्दा आभार बी प्रगट कीता ते आखेआ कि राष्ट्र सेवा उन्दे जीवन दी सभ्बने शा पैहली तरजीह ऐ ते ओ एहदे लेई म्हेशा समर्पत रौहगंन।

<><><><><><>

LG Rajnath

रक्षामंत्री राजनाथ सिंह हुंदा अज्ज श्रीनगर पुज्जने पर उपराज्यपाल मनोज सिन्हा हुंदे आसेआ अगुवानी कीती गेई। इस बारे अपने इक सोशल मीडिया एक्स पर एल.जी होरें आखेआ कि रक्षामंत्री हुंदा जम्मू-कश्मीर दी सोए आहली राजधानी च सुआगत कीता। राजनाथ सिंह होर लद्दाख केन्द्र शासित दे द्रास दे दंऊ दिनें दे दौरे पर जा रदे हे जिस दौरान ओह करगिल युद्ध स्मारक पर करगिल विजय दिवस समारोह च हिस्सा लैगंन। "करगिल विजय दिवस" हर बरे 26 जुलाई गी 1999 आहले करगिल युद्ध च भारत दी कामयाबी दे चेते च मनाया जंदा ऐ-जंदू पाकिस्तानी फौजिएं छप्पियै भारत दिएं केई उच्चियें चौकिएं पर कब्जा करी लैता हा-जिनें'गी भारती सेना नै आप्रेशन विजय चलाइयै नसाई दिता हा ते 26 जुलाई 1999 गी पूरे इलाके गी परतियै अपने कब्जे च लेई लैता हा।

<><><><><><>

Prog. Announcement (Byte)

आकाशवाणी दे प्रादेशिक समाचर एकांश जम्मू आसेया “करगिल विजय दिवस” दे सरबंध्यै च- कल ऐतवारें 30एं मिन्टें दा इक विशेष कार्यक्रम प्रसारित कीता जाग- जेदा विषे होग- “नमन ते सम्मान”. कल दपैहरी ढाई बजे प्रसारित होने आहले इस कार्यक्रम च स्हाड़े परोहने होगन- भारती सेना दे पूर्व कर्नल आर.के शर्मा- जेहड़े इस विषे पर अपने माहिराना विचार सांझे करगन। इस कार्यक्रम दी मेजबानी साहूड़ी न्यूज एंकर श्रुति खजूरिया आसेया कीती जाग। पेश ऐ इस कार्यक्रम दी निक्की नेंई इक झलक.....(Teaser)

<><><><><>

LG Marathon (Byte)

उपराज्यपाल मनोज सिन्हा होरें अज्ज श्रीनगर च डल झील दे कंडे आयोजित रीडिंग मैराथन दा उदघाटन कीता जेहदा सरिस्ता राष्ट्रीय शिक्षा नीति दे 6 बरे पूरे होने दे मौके पर नैशनल बुक ट्रस्ट आसेआ आयोजित शिक्षा सप्ताह दे हिस्से दे तौरा पर कीता गेदा हा। इस मौके मजूदा ज्हारां बदे विद्यार्थियें गी सम्बोधित करदे होई एल.जी होरें आखेआ जे शिक्षा गी क्लासें शा अगो स्हाड़े रोजमर्रा दे जीवनै च सक्रियता कन्नै इस्तमाल कीता जाना लोड़चदा। मैराथन दा विषये दिता गेदा हा“रन फॉर ग्रीन फ्यूचर”। मतलब “हरे-भरे भविष्य लेई द्रौड़” जेहदे च पढ़ने दी आदत-तंदरुस्ती ते पर्यावरण गी लेइयै सब्भेनें दी सांझी जिम्मेदारी जनेए प्रमुख मुद्दें पर ध्यान केन्द्रित कीता गेआ। एल.जी सिन्हा होरें नौजवानें अगो अपील कीती जे ओ अपने अंदर कताबां पढ़ने दी आदत विकसित करने-पर्यावरण दी रक्षा करने ते राष्ट्र दी सेवा लेई हर बेल्ले तयार रौहन। औंदे विजय दिवस दी पछोकड़ै च मनोज सिन्हा होरें करगिल युद्ध दे नायकें दी दलेरी ते राष्ट्र-प्रेम गी चेता करदे होई आखेआ.....(बाईट)

<><><><><>

SMVD Yatra Resumes (Byte)

कटरा च लगातार बरखा होने दे बावजूद अज्ज श्री माता वैष्णो देवी जी दी पवित्तर गुफा च मत्था टेकने लेई श्रद्धालुएं दी बड़ी भारी भीड़ दिक्खने गी लब्बी। उत्साही यात्रिएं बड़े मते जोश कन्नै अपनी यात्रा शुरू कीती। गौरतलब ऐ जे वैष्णो देवी जी यात्रा 6 दिनें परैन्त अज्ज परतियै शुरू होई। ज्हार बधदे श्रद्धालुएं दा जोश यात्रा शुरू होने दी खुशी च दुगना होई गेदा हा। श्राइन बोर्ड ते सुरक्षा एजेंसियें यात्रा गी सुचारु ढंगै कन्नै चलाने आस्तै रस्ते च एमरजेंसी रिस्पांस टीमें, मेडिकल स्टॉफ ते आपदा प्रबंधन अमले दी तैनाती कीती दी ऐ। अधिकारियें श्रद्धालुएं गी आखेआ ऐ जे ओह सौगा-सतर्क रौहन, सरकारी निर्देशें दी पालमा करन ते जोखिम आहले इलाकें थमां दूर रौहन। आकाशवाणी समाचार कन्नै गल्लबात करदे होई किश श्रद्धालुएं आखेआ.....(बाईट)

<><><><><>

JKTPO Indus Food

बपार-कारोबार गी बढ़ावा देने सरबन्धी संगठन (Jammu Kashmir Trade Promotion Organization-JKTPO) इंडस फूड अहमदाबाद-2026 च इस खित्ते दे शीर्ष खाद्/-खाने-पीने/राई-बाई ते बागवानी उत्पादें दे प्रदर्शन करा'रदा ऐ। जम्मू-कश्मीर दे पंडाल च GI Tag केसर खास चीजें गी प्रदर्शित कीता जा'रदा ऐ। इस कार्यक्रम दे तैहत भलेयां लौहके-लौहके ते दरम्याने दर्जे दे उद्यमियें/करसान उत्पादक संगठनं ते महिला उद्यमियें गी मुकामी ते अंतराष्ट्री खरीददारें कन्नै जुड़ने दा मौका थ्होग। अधिकारियें दस्सेआ जे एहदा मकसद जम्मू-कश्मीर आहले ब्रांड गी बढ़ावा देना/निर्यात दे मौकें गी बढ़ावा देना ते मुकामी उत्पादकें लेई बजारें तगर पुज्जने गी सखल्ला बनाना ऐ। इस गैह कन्नै बपार बधाने/उत्पादें दी पुज्ज च सधार ते केन्द्र शासत प्रदेश च स्थिर आर्थिक विकास च बढ़ावा थ्होने दी मेद ऐ।

<><><><><><>

PM- MKB

प्रधानमंत्री नरेन्द्र मोदी होर कल दिने 11 बजे आकाशवाणी पर प्रसारित होने आहले महावार कार्यक्रम “मन की बात” राएं देश-विदेश दे लोकें कन्नै अपने विचार-सांझे करडन। हर महीने दे खीरी ऐतवार गी प्रसार होने आहले इस कार्यक्रम दी एह 136मी किश्त होग। कार्यक्रम दा प्रसारण आकाशवाणी ते दूरदर्शन दे समूलचे नैटवर्क ए.आई.आर. न्यूज वेबसाईट ते न्यूज ऑन ए.आई.आर. Mobile App- डी.डी. न्यूज- प्रधानमंत्री हुंदे दफ्तर ते सूचना ते प्रसारण मंत्रालय दे यू-ट्यूब चैनलें पर बी होग। हिंदी प्रसारण दे तुरत मगरा एहदा डोगरी भाषा च अनुवाद प्रसारित कीता जाहग।

<><><><><><>

Udhampur Water Supply (Byte)

जल शक्ति विभाग मुजब लगातार भारी बरखा कारण उधमपुर जिले च पानी सप्लाई सरबंधी 102 स्कीमें गी नुक्सान पुज्जा ऐ-जिंदे चा 27 गंभीर तौर पर प्रभावित होइयां न। विभाग दे इंजीनियर महेश शर्मा होरें दस्सेआ जे तवी दरेया च बड़ी मती गंदगी कारण पानी गी साफ करने आहली प्रक्रिया च विघ्न पोआ रदा ऐ-जेहदे करी उधमपुर शैहर गी हर रोज दे बजाए इक दिन छोड़िए पानी थ्होआ करदा ऐ। रामनगर/चनैनी ते केंई ग्रामीण इलाकें सब्बने शा मते प्रभावित न। मौसम च सुधार होने दे मगरा बहाली शुरु होई जाग ते इक हफ्ते दे अंदर-अंदर बड्डी मरम्मत कीते जाने दी मेद ऐ। इस बारे होर जानकारी दिंदे होई जल शक्ति विभाग दे Executive Engineer महेश शर्मा होरें आखेआ.....(बाईट)

<><><><><><>

Weather (Byte)

मौसम विभाग नै जम्मू-कश्मीर च अज्जै थमां 27 जुलाई धोड़ी अद्दे-दुब्बे तौरा पर बहल छाए दे रौहने ते प्रदेश दिएं टामीं-टामीं थाहें पर हल्की बरखा बरने दी पेशनगोई कीती ऐ। एहदे परेंत 28 थमां 30 जुलाई धोड़ी परतियै बरखा बरने दे इमकान दस्से गे न। विभाग नै अगले 5एं दिनें लेई संवेदनशील थाहरें पर चानचक्क हाइ औने ते ल्हास-पस्सियां पौने दी शेंका जाहिर कीती ऐ। प्रशासन नै लोकें गी सलाह दिती ऐ जे ओह सौहगे-सतर्क रौहना होर मती जानकारी कन्नै मौसम विभाग दे डरैक्टर मुख्तार अहमद(बाईट)

<><><><><><>